

La regenza ha nominà il cussegl turistic

Emprim pass da la realisaziun dal program da cooperaziun en il turissem grischun 2014–2021

DA MARTIN CABALZAR

■ **Il cussegl turistic cussegla la regenza ed ils acturs turistics davart temas strategics, cunzunt davart l'ulteriur svilup da las destinaziuns. El dat novs impuls per la competitivitat internaziunala e promova per quest intent il svilup da projects innovativs. El procura per ina perspectiva externa critica e creativa e per in dialog progressiv cun ils acturs turistics.** Cun la convocaziun dal cussegl turistic dal Grischun cumenza il nov program da turissem 2014 fin 2021. L'emprim president daventa *Ernst A. Brugger*, dal reminent il figl da l'anteriur cusseglier federal Ernst Brugger.

Novas structurass per il turissem grischun

«La refurma dal turissem grischun 2006 fin 2013 ha procurà per structurass pli concisas en il turissem e per ina forza da per-

Cussegl turistic dal Grischun

Il cussegl turistic sa raduna per regla quatter giadas per onn. El infurmescha regularmain davart sias activitads. La commembra ed ils commembers èn vegnids elegids per ina perioda d'uffizi da quatter onns. La reelecziun è pussaivla in'unica giada.

Ernst Brugger, parsura
Martin Candrian
Marcel Friberg
Jeannine Pilloud
Jürg Schmid
Hansjörg Trachsel
Alois Zwinggi

svader pli gronda», ha constatà cusseglier guvernativ *Hansjörg Trachsel* ier a la conferenza da medias. Ussa ha i num da sa distinguer da la concorrenza internaziunala sin il martgà tras purschidas unicas, d'alta qualitad ed unidas e da porscher als giasts in'aventura complessiva unica, ha punctuà Trachsel. Exactamain qua è il punct da partenza dal program da turissem grischun 2014 fin 2021. Projects ch'integreschan en moda cooperativa ils differents offents d'ina regiun turistica u dal chantun e che han ina strategia cuminaivla pon vegnir sustegnids en il rom d'in credit d'impegn da 21 milliuns francs durant ils proxims otg onns. La confederaziun ed il chantun sa participeschan mintgamai per la mesadad cun 10,5 milliuns francs. En il rom dals projects sustegnids duain ultra da quai vegnir acquirids ulteriurs meds finansials.

Cussegl turistic per la direziun strategica dal turissem 2014–2021

Il turissem grischun stat pli e pli en la concorrenza internaziunala. In'analisi e strategia progressiva, critica e creativa è pli impurtanta che mai. Il sustegn da projects innovativs e progressivs duai mussar vias empermettentas. Per quest intent sco er per la direziun strategica dal program da turissem grischun 2014 fin 2021 ha la regenza nominà in cussegl turistic che consista da set fin indesch personalitads. Il cussegl turistic duai sa sviluppar a «l'istanza turistica» per propi dal Grischun. El cussegla, senza avair la competenza da decider directa. Sia incumbensa è quella da sviluppar vinavant il sistem turistic general «turissem grischun». Per la cumposiziun dal cussegl turistic è en emprima lingia decisivas las competenzas professiunals che vegnan giuditgadas sco necessarias per sviluppar a lunga vista il turissem grischun. Plinavant è impurtanta la relaziun da las singulas personalitads cun il Grischun. A medem temp



Il cussegl turistic duai dar novs impuls al turissem grischun e cusseglier tant la regenza sco ils acturs turistics. FOTO O. ITEM

ston talas er cumprovar ina independenza uschè gronda sco pussaivel.

Cussegla la regenza ed ils acturs turistics

Ultra da l'orientaziun strategica è decisiva naturalmain er la realisaziun. Il cussegl turistic n'è pia betg mo in gremi consultativ da la regenza, mabain el cussegla, motivescha e sustegna ils acturs turistics a sviluppar projects ed a realisar quels cun success. D'impurtanza centrala è qua in'orientaziun consequenta a projects innovativs, competitivs sin plaun internaziunal e marcads tenor principis d'interpresa. En il cussegl turistic na sa tracti pia betg da represchentanzenzas politicas u da represchentanzenzas dals interess da las destinaziuns. Il barat activ tranter il cussegl turistic e las represchentanzenzas da las destinaziuns sco er da las branschas è dentant a medem temp fitg impurtant. Previs è perquai in dialog regular tranter il cussegl turistic e las represchentanzenzas

da l'economia turistica sco er da las destinaziuns.

Ernst Brugger unescha differentsas competenzas

Cun Ernst A. Brugger hajan ins guda gnà ina ferma personalitad per la funcziun da president dal cussegl turistic, punctuescha Trachsel. Brugger è s'occupà durant sia entira carriera cun dumondas dal svilup regiunal, da la persistenza e dal svilup da strategias. Sco expert cumprovà lavuria el per differentsas interpresas, dentant er per differents posts federals e per organizaziuns senza finamira da profit ed haja ina vasta rait internaziunala da contacts. «Ultra da quai ha el in bun dun da contractar, da colliar, da motivar, da provocar e da communitgar», di Trachsel.

Cumposiziun dal cussegl turistic

Il cussegl turistic sto disponer ultra da quai d'ina competenza en ils secturs manaschament dal lieu e da las destinaziuns, svilup

da las destinaziuns, organizaziun da viadis, da congress e da furmaziun supplementara, martgads e pievels esters, concepziun e commercialisaziun da las purschidas, logistica e systems da transport sco er d'enconuschientschas dal Grischun, dal turissem grischun e da l'economia grischuna. Questas competenzas vegnan furnidas da las suandantas personalitads: *Martin Candrian*, Candrian Catering SA, Turitg; *Jeannine Pilloud*, direziun dal concern da las VFF, manadra dal traffic da persunas, Berna; *Jürg Schmid*, CEO Svizra Turissem, Turitg; *Alois Zwinggi*, managing director dal Forum economic mundial, Cologny (Genevra).

D'uffizi èn participads al cussegl turistic il schef dal departament d'economia publica e fatgs socials sco er il president da Grischun Vacanze. Questa cumposiziun duai vegnir cumplettada cun nominaziuns sistematicas tras la regenza, cunzunt dals secturs da competenza organizaziun da viadis, marketing e tecnologia d'infurmaziun.